

Date – 02/01/2025

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Vawiin khan kohhran hrang hrangin kum thar lawmna ruai an theh.
2. Mizoram sorkar chuan kumin January leh May thla chhung hian sawhthing chingtute thar chhuah a hralh dawn.
3. Prime Minister Narendra Modi-a'n Maharashtra Sawrkar chu Maoist helte awmna hmuna an hmalaknaah a fak thu a sawi.
4. India chuan Myanmar nena a inrina kilometer 9-a thui a hung zo tawh.

<><><>

### NEW YEAR FEASTS

Vawiin khan kohhran hrang hrangin kum thar lawmna ruai an theh.

Kum thar ruai theh hi kumthar lawm tawpna a ni a, khaw thenkhatah erawh chuan ruai nawn an awm tura ngaih a ni a. Nimin lamah kohhran tam ber chuan thingpui leh chhang ruai thehin vawiin lamah kum thar lawmna ruai an theh a. Nimin lama ruai theh kohhran thahnem tak an awm bawk a. Thenkhat chuan vawiin lamah ruai an nawn a ni. Vawiin hian biak-ina inkhawm leh lengkhawm an awm bawk a, tlai lamah ruai hi an theh a, heti hian kum thar lawmna chu a tiak dawn ta a ni.

Champhai District a khua leh veng tam zawkah nimin khan kumthar 2025 lawmna ruai kilho a nih laiin kohhran thenkhat chuan vawiinah kumthar lawmna ruai an buatsaih a, zanin inkhawm banah kumthar lawmna a tiak ang. He tih lai hian Champhai Tlangsam Presbyterian kohhran chuan kum kalta 2024 ah an kohhran mi thi an awm miah loh avangin nimina kumthar lawmna ruai an kilho hnuah vawiin khan Pathian hnena lawmthu sawi inkhawm an buatsaih bakah vawiin khan a lawmna ruai an theh a ni.

Lawngtlai-ah chuan ruai nen a Kumthar lawmna chhunzawm lote pawhin Pathian faka zaikhawmin kumthar lawmna hi an chhunzawma, Kohhran hrang hrangte'n January 5, Pathianni zan thleng Kumthar lawm a, zaikhawm turin ruahmanna an siam. Lawngtlai khawpuiah dawr inhawng mumal a la awm lova, eichawp zawrhna leh damdawi dawr bak inhawng mumal a awm lo a ni.

Saitualah pawh nimin kumthar ni kha Pathianni anga serh niin Chawhma, chawhnu leh zan lamah thupui neiin Kohhran hoten Pathian thuchah an ngaithla a, inkhawm kar lakah lengkhawm awmin hlim takin Kumthar hman a ni a, Vawiin hian Kohhran tam zawk chuan ruai an theh a. Zan lamah lenkhawm programme siam Kohhran engemaw zat an la awm a, lenkhawm a zawh hunah Kumthar lawmna hi a tiak ang.

Kolasib district-ah chuan nimin khan Catholic, ICI, UPC leh Kohhran thenkhatin Kumthar lawmna ruai an theh a. Vawiinah Kohhran thahnem takin kumthar lawmna ruai an theh bawk a ni.

<><><>

GOVERNOR

Mizoram larsap kal chhuak Dr. Hari Babu Kambhampati chuan tukin dar 8 khan Aizawl Raj Bhavan a chhuahsan.

Larsap hi a secretary leh Raj Bhavan hnathawk dangte'n an thlah a. Chawhma dar 9 velah Lengpui tumhmun thleng thla-in hetah hian chief minister Pu Lalduhoma, assembly speaker Pu Lalbiakzama, home minister Pu K. Sapdanga leh PWD minister Pu Vanlalhlana te bakah chief secretary Pu Khilli Ram Meena, DGP Pu Anil Shukla te bakah Aizawl bawrhsap, SP leh state protocol officer-te'n lo dawngsawngin Police-te'n chawimawina sang 'guard of honour' an hlan a. Lengpui tumhmuna amah thlahna inkhawmah hian Pu Kambhampati chuan Mizoram a cham chung a tawiamna leh duhsakna hrang hrang a dawn thin avangin lawmthu a sawi a. Mizoram hmasawn tura theihna nasa tak a neih thu leh hengte hi chak taka bawhzui a ngaih thu sawiin, inthlanna leh assembly session kalpui dante chu ram chung hmun dangte tana entawntlak tak a ni, a ti a. Mizo thalaite'n theihna leh thiamna an neih that thu sawiin, thiam thil zirna kawnga intuaihriam leh State pawna hna thawk thei tura hmalak zel a tul thu a sawi a ni.

Chief Minister Pu Lalduhoma pawhin he hunah hian Mizoram tana tha leh tui a lo sen tawnate avangin larsap hnenah lawmthu a sawi a. A hna thar atan duhsakna a hlan bakah remchang hmasa bera Mizoram rawn tlawh leh turin a sawm bawk a ni.

Larsap kalchhuak hi chawhma dar 10 leh minute 15 khan Bhubaneswar panin a thlawk liam ta a ni. Ruat a nih angin naktukah Bhubaneswar Raj Bhavan-ah thu tiam tira Odhisa larsap tura lakluh a ni dawn a ni.

Puan tawh angin Pu Kambhampati hian July ni 19, 2021 khan Mizoram larsap hna a chelh tan a, Pu P. S. Sreedharan Pillai a rawn thlak a ni. A hun chung hian Mizoram hmun hrang hrang a tlawh kual a, Mizoram hmasawna atana rilru leh ngaihtuahna seng tak ni a ngaih a ni a. A bikin sorkar laipui-in mirethei zawkte khaihuahna atana ruahmanna a siamte Mizoram a a mamawhte'n hmang tangkai tawk lo leh hre tawk lova a hriat avangin hetiang lam hi thahnemngai takin a tlangaupui thin a ni.

<><><>

DRUGS DESTROYED

Chin state a Myanmar sipai sorkar dotu pawl lian ber Chin National Front (CNF)/Chin National Army (CNA) te chuan tun hnai khan Mizoram lama tawlhruk tur ruihhlo an man cheng vaibelchhe 40 chuang hu an halral.

CNA-te hian Mizoram lama heroin tawlhruk tur an man khawm hi an sipai hmunpui, Farkawn khua atanga hla vak lo Camp Victoria ah an halral a. India tangka a cheng vaibelchhe 40 chuang hu ni a hriat a ni a. Ruihhlo halralna-ah hian Farkawn VCP leh joint YMA hrutute pawhin tel pui-in thu an sawi a. Mizorama thalai tam tak suat theitu tur ruihhlo an lo man avangin CNA te chungah lawmthu an sawi a ni.

<><><>

MIZORAM PWD

Mizoram PWD hnuaiah hna ruak hnawh khah loh 318 a awm mek.

Akashvani palai zawhna chhangin Mizoram PWD hotute chuan SDO, JE, Overseer leh SA-ah an indaih loh nasat thu an sawi a, tun dinhmunah SDO-ah post ruak 63, Junior Engineer ah post ruak 148, Overseer-ah post ruak 13 leh Sectional Assistant-ah post ruak an neih mek thu an sawi. Heng post ruak hnawh khah lohte hi sanctioned post atanga chhut a za zela 42 a nih thu an sawi. PWD hotute chuan an post ruak neihte thuneitu lamin a theih dan ang ang a hnawh khah sak an mamawh hle thu an sawi bawk.

<><><>

GINGER

Adviser to Chief Minister (hand-holding policy) Dr. K.C. Lalmalsawmzauva'n Mizoram sorkarin kumin January leh May thla chhung hian sawhthing a lei dawn thu a sawi.

Adviser to CM chuan bana kaih ruahmanna hnuai a January leh May thla inkara sawhthing lei chungchang hi naktuk January ni 3-a Mizoram Agriculture Marketing Board thutkhawm hnuah chauh a tihfe a nih tur thu a sawi a. Sawhthing chingtu inzawmkhawm pawl society 675 an inziahluh tawh thu a sawi a, anni kaltlang hian sawhthing hi a lei tura ruatte'n an lei dawn tih a sawi . Akashvani Aizawl palai zawhna chhangin Adviser to CM chuan loneitute sawhthing thar grade a then chungchang chu a leitu tur sumdawngte leh society-te inbiak remna ang zel tur a nih thu a sawi bawk.

Agriculture department chhianchhiah danin Mizoram chhungah sawhthing quintal nuai khat sing ruk sang riak za nga sawmriat pathum leh kg 28 lin a ni a. Hemi atang hian quintal nuai sawm sing kua sang thum za hnih sawmkua pakua leh kg 76 thar chhuah beisei a ni. Serchhip district chu sawhthing ling hnem ber an ni a, sawhthing quintal sing nga sang sarikh za ruk sawmli leh kg 613 lin a ni a, thar beisei zat hi nuai 3, sing 4, sang 1 leh 840 a ni a. A block ang zawnga ling hnem ber pawh Serchhip District chhunga mi East Lungdar block niin quintal sing thum sang khat sawmruk pasarikh leh kg 698 an ling a, thar beisei zat hi quintal nuai 1 sing 8, sang 6 leh 2 leh kg 57 a ni. Sawhthing ching tlem ber Hnahthial district chuan sawhthing quintal 7,171 leh kg 76 an ling a, quintal 46,775 thar an beisei.

Mizoram pumpui chhutin sawhthing hi ram acre 27,608 chuang a zau ah lin a ni a, chhungkaw 25,102 ten sawhthing hi an ling a ni.

<><><>

ASF UPDATE

Nimin leh vawiin khan African Swine Fever (ASF) vawk pulhri avanga vawk thi leh suat a awm loh avangin kumin 2025-ah ASF vawk pulhri avangin vawk thi leh suat a la awm lo a ni.

Animal Husbandry & Veterinary department hotute'n an chhinchhiah dan chuan kum hlui 2024 February ni 9 a Champhai district Leithum khua a ASF vawk pulhri vei an finfiah atanga nikum chhung zawnga he vawk pulhri avanga vawk thi zat chu 14,950 a ni a. Vawk pulhri darh zel tur venna atan vawk 24,177 suat a ni bawk. Mizorama vawk pulhri leng hian thlasik intan November atang khan zia-awm lam a pan chhova, mimalin vawk tam tham an vulhna hmun pulhri-in a luh chilh avanga thi leh suat tam ni deuh a awm leh zauh thin chungin a zia-awm chho zel a. December thla khan thi leh suat a tlem tawh hle a ni.

March ni 21, 2021 khan Lunglei district a Lungsen khua-ah ASF vawk pulhri vei hi finfiah hmasak ber a ni a. Hemi atanga nikum thlenga he vawk pulhri avanga vawk thi zat chu 62,167 a tling tawh a. Kum 2021 khan vawk 33,417 thi-in kum 2022 khan 12,761 thi-in niklum khan 1,039 a thi leh bawk a ni. Vawk suat zat hi kum 4 chhung hian vawk 49,267 suat a ni a. ASF vawk pulhri avanga Mizoram vawk a chan zawng zawng hi nuai 1, sing 1, sang 1 leh 434 zet a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

PM MODI LAUDS MAHARASHTRA GOVT'S DEVELOPMENT EFFORTS IN MAOIST-AFFECTED AREAS

Prime Minister Narendra Modi-a chuan Maharashtra Sawrkar chu hmun kilkhawr leh Maoist helten an chenchilhna hmuna hmasawna thlen kawnga an thah-thawhah a fak thu a sawi.

Vantlang auhmun (social media)-a a tarlan danin Narendra Modi-a chuan hei hian nunphung a tihzangkhai tur thu leh hmasawna thuang dang atan pawha kawng a hawn tur thu a sawi a. A bik takin Gadchiroli leh a chhehvel mipuite a lawmpui thu a sawi.

Nimin khan Naxalites hel 11 chu Maharashtra Chief Minister Devendra Fadnavis-a kutah Gadchiroli-ah an inpe a. Devendra Fadnavis-a chuan Maharashtra chu Naxal chiam buai lohna hmun a la ni thuai ang a ti.

<><><>

INDIA COMPLETES OVER 9 KM FENCING ALONG MYANMAR BORDER

India chuan Myanmar nena a inrina kilometer 9 a hung zo tawh a. Ramri hung hna hi thawh chhunzawm mek zel a ni.

Tun hnaia Home Ministry-in report an tihchhuaha tarlan danin Manipur, Moreh hrula Myanmar ramri chu hung zawh tawh a ni a. Kilometer 21-a thui ramri hung hna chu nikum February thla khan Border Road Organization kutah dah a ni a, an ni hian ramri hung hna hi an thawk mek a ni.

India leh Myanmar-in ramri an intawm chu kilometer 1,643-a thui a ni a, hei hi Arunachal Pradesh, Nagaland, Manipur leh Mizoram-ten an ri a ni. Kilometer 1472-a thui ramri chu rin fel a nih tawh thu Home Ministry chuan a sawi bawk.

<><><>